

夢

林

玄

解

夢林玄解卷之三十一

夢徵

人物部

帝王
神鬼

聖賢
釋道

將相
義倫

神仙

○○○帝王類

○帝賚良弼

商

高宗恭默思道。夢帝賚與良弼。其代予言。乃審厥象。俾以形旁求天下。說築於傅巖之野。惟肖立爲相。

○帝與九齡

周

文王謂武王曰。汝何夢矣。武王曰。夢帝與我九齡。文王曰。汝謂何也。武王曰。西方有九國焉。君王其終撫諸。文王曰。

非也。古者謂年齡齒亦齡也。我百爾九十。吾與三焉。文王九十七乃終。武王九十三而終。

○國君

戰國

列子書有老役夫晝則呻吟。夜則熟寐。夢爲國君。覺而曰。吾晝爲僕。夜爲君。何愁。

○與已言論

吳

呂蒙學易。夢伏羲文王周公孔子。與已言論。世祚興亡之事。日月廣明之道。莫不窮精極妙。

○改封中山王

齊

始興王憺夢改封中山王。策授如他日。惡之。數旬而卒。追

贈之典及焉。

○玄元皇帝

唐

玄宗夢玄元皇帝云。吾像在京城西南百餘里。遣使求得之於盤屋。迎置興慶宮。

○主君來

明

常鄂國遇春。狀貌甚偉。臂有脩毫。黑色如猿。年二十。歸群。雄劉聚。驍勇爲諸軍冠。後察聚剽掠無遠圖。聞高皇威名。糾心腹數十人。棄聚來歸。未至。因臥田間。夢神人披甲擁盾呼之曰。起起。主君來。因寤。果見高皇騎從至。乞歸附。高皇曰。爾依劉聚。何忽改圖。雖然。察爾氣度。非聚所

得。有。也。遂。用。以。爲。前。鋒。

○○○聖賢類

○見周公

蜀漢

諸葛武侯出師至蔡山。夢見周公。故名其山爲周公山。因立文憲廟其上。

○孔子南行

西晉

王弼著易。夢執漆器。隨孔子南行。

○○○將相類

○携授陸渾

戰國

荀吳帥師滅陸渾。數之。以其貳于楚也。陸渾子奔楚。其衆

奔甘鹿園大獲韓宣子夢文公携荀吳而授之陸渾故使
穆子帥師獻俘於文宮。

○賈王爲祟

魏

王凌貳於司馬懿爲懿所收道經賈逵廟凌呼曰賈梁道
王凌是魏忠臣惟爾有神知之時四月也至六月懿寢疾
夢賈逵王凌爲祟遂薨。

○爲恪所擊

吳

諸葛恪爲孫峻所害及峻使呂據征魏餞之石頭入據營
惡據軍嚴整稱心痛去是夜遂夢爲恪所擊恐懼發病死。

○劉坐其處

東晉

王恭舉兵以討王愉爲辭。夜夢劉牢之坐其處。旦謂牢之曰。事尅卽以卿爲北府。後牢之斬顏延以降。恭敗。朝廷卽以恭位號處牢之。如所夢云。

○朝士喫茶

西晉

奚陟少時。夢夏日與朝士二十餘人喫茶。陟東行首座。茶起西自南而行。不得至。陟渴甚不堪。俄有一吏抱簿書致筆硯請押。陟方熱渴。乘高推其案曰。且將去。濃墨滿硯。正中文書之上。并吏人之面。手足衣服無不沾汚。乃驚覺。夜索紙筆細錄。藏于巾笥。後十五年。爲吏部侍郎。請同舍郎茶會。陟爲主人。東面首坐。坐者二十餘人。旣緩行。陟有瘡。

疾加之熱乏茶不可得頗燥悶有一吏抱文簿兼筆硯請押陟燥忿乃推去并案皆倒正中吏面及簿書盡濕坐客大笑陟方悟管年之夢語于同省取所記事驗之無分毫差焉。

○劉鎮軍相迎

宋

劉穆之夢有人稱劉鎮軍相迎旦占之曰吾死矣。今豈有劉鎮軍耶。後宋武帝遣人迎之共定大業武帝時爲鎮軍將軍。

○謀陷清直士

隋

宋造道與李構善遊道死其子士遜誣陷構構於禁所祭

道而訴焉。士遜晝臥夢遊道。怒曰：我與構恩義，汝豈不知？何其小人謀陷清直之士！士遜驚跪曰：不敢，不敢。旬日而卒。

○卿可取之

隋

寇仁祖斬城陽王徽首，送爾朱兆。兆夢徽告曰：我有金二百斤，馬一百匹，在仁祖家。卿可取之。兆於是懸祖仁首于高樹，以大石墜其足，鞭箠之間得金及馬。而祖仁死時，以爲陽報云。

○我明日當戰

隋

漢王諒反，周羅喉副楊素討之。中流矢卒。是年七月，其子

仲隱夢暎曰。我明日當戰。次早其靈座上。弓箭刀劍無故自動。若人帶持之狀。是日絳州城陷。

○與徵別

唐

魏徵疾。太宗夢與徵別。既寤流涕。是夕徵卒。故御製碑文曰。晉高宗得良弼於夢中。朕今失賢臣于覺後。

○靖勸求食

唐

安祿山擊契丹。還秦臣夢李靖李勣向臣求食。上乃命祠之北郡。

○紫衣貴人

唐

崔圓少貧賤。依親李彥先。彥先時爲刑部尚書。待之不甚。

加禮。一夕，彥先夢桎梏其背。同輩百人爲兵擁入大府，呼姓名領過。判云：「准法。」彥先親見紫衣貴人據案中坐，乃圓也。遂躍出哀呼。貴人曰：「李彥先特收禁流汗而覺，自此方厚待之。」因薦於楊國忠，遂以知留後。旬日拜相。京城克復，彥先坐受僞官，與陳希烈等二百人俱合誅死。時圓爲中書令，詳決之際，以姓名呼過。判云：「准法。」彥先大呼曰：「相公獨不憶管年耶？」圓乃悟，遂判李彥先收禁具表，其事請贖罪，許之得流嶺外。

○玉童爲宰相

唐

王朝國夢人領一綠衣童子曰：「汝有憂氏之心，賜此玉童。」

爲宰相是夕夫人孕生慶之。

○將軍巡南岳

唐

康紫霞楊州東陵聖母廟主女道士也。自言少時夢中被
人錄于一處言天符令稱將軍巡南岳遂棍以金鑲甲令
騎道從千餘人馬蹀虛南去須臾至岳神拜馬前夢中如
有處分岳中嶧嶺溪無不歷也恍惚而返鷄鳴驚覺自是
生鬚數十莖。

○館我羅池

唐

柳宗元既謫一日與部將魏忠謝寧歐陽翼飲醉驛亭謂
曰吾棄于時而寄于此間與若等好也明年吾將死而爲

神後三年。可爲廟祀。我及期而死。三年孟秋辛卯。元降於州之後堂。翼等見而拜之。其夕翼夢元告之曰。館我于羅池。其日廟成。大祭。有過客李儀。醉酒慢侮堂上。得疾扶出。廟門卽死。子謂元生能澤其民。死能驚動禍福之。以食其土。可謂靈也已。

○杲卿見夢

唐

顏杲卿被殺。棄首于衢。莫敢收。有張湊者。得其髮持謁上。皇是夕見夢。帝寤爲祭。

○任調拜相

唐

張鑑大曆中。守工部尚書。判度支。因奏事稱旨。代宗面許。

宰相恩澤甚厚。張日冀望而累旬無信。忽夜夢有人自門遽入。抗聲曰。任調拜相。張公驚寤。思中外無其人。尋譯不解。有外甥李通。禮者。博學多智。張因召令研其理。李沉思良久。因賀曰。舅作相矣。張詰之。李答曰。任調反語。饒甜。饒甜無逾甘艸。甘艸獨爲珍藥。珍藥反語。卽舅名氏也。張甚悅。俄有走馬吏報曰。白麻下。公拜中書侍郎平章事。

○光晟拜相

唐

張光晟家甚微而有才勇。性落魄嗜酒。壯年爲潼關卒。屢被主將鞭笞。因奉役至華州。盛暑驅馳。心不能平。過嶽祠。遂脫衣買酒。致奠金天王。朗言曰。張光晟身負才器。未遇

知已富貴貧賤不能自料惟神聰鑒當賜誠告禱訖因飲大醉晝寢於碑堂忽夢傳聲云喚張光晟追蹙甚急卽入一府署嚴邃異常導者云張光晟到拜跪訖遙見當廳貴人有如王者謂之曰欲知官祿但光晟拜相則天下太平言訖驚寤沾汗後積勞官至司農卿及建中西狩光晟爲朱泚所廢拜光晟僕射平章事統兵出戰大敗而還天下遂太平

○丞相至矣

宋

梅詢坐議天書出知濠州夢人告曰呂丞相至矣旣而呂夷簡通判州事待之甚厚其後援之廢斥中登貴顯皆夷

簡力焉。

○太平宰相

宋

歐陽脩以學問文章爲天下所宗。一杭僧夢遇脩於江廟中。廟神皆起拱立曰。歐陽相公平生一念之善及人甚多。將來太平宰相也。豈敢不敬。後果入中書參大政。初知南譙日。忽夢授潁州。又夢公僕輩具帳夢中問主者何用。對曰。此宴相公物。令交割與新知州。明日與幕中會。因說此夢。未幾分移楊州。又數年果差知潁州。人云食祿有方。信前定之不可移也。

○德被生民

宋

富鄭公早年嘗夢青州王相公以後事相托。鄭公曰：相公德被生民，當得遐壽。何遽及此？後二年，罷相知鄆州，辟鄭公爲倅。到任歲餘，有大星墜於宅園東北角。家人恠之。相公曰：後自當見。至後，自薨。鄭公爲主喪事。故鄭公挽詞云：遺德被生民，正與當年夢中符契。

○有宰相來

宋

文潞公少從父赴蜀，過成都，入江瀆廟，官接之甚勤。且言：夜夢神令洒掃祠庭。明日有宰相來，公豈異日之宰相乎？公笑曰：宰相非所望。若爲成都，當令廟宇一新。後公以樞密直知益州，新其廟，及成，壯甲天下。

樞密直學士

宋

羅彥國累試不第。祈夢于梓潼神。夢神謂曰：「已除君樞密直學士矣。明年彥國復下第，投牒乞進舉，推恩授密州文學。蓋密學之應也。」

○翰林學士

宋

元厚之少時，曾夢人告之曰：「異日當爲翰林學士。須弟兄四人同在禁中，厚之自思，奈無兄弟，疑此夢爲不然。熙寧中，厚之除學士，同時先後入院四人：一韓持國，一陳和叔，一鄧文約，一楊元素，繪并厚之名絳，五人各皆從系，始悟弟兄之說。」

○項安節

宋

慈聖光獻皇后嘗夢神人語云太平宰相項安節神宗密求諸朝臣及遍詢吏部無有此姓名者久之吳充爲上相療瘡生頸間百藥不差一日立朝項上腫如拳后見之告上曰此真項安節也

○眷如平生

宋

蔡抗爲英宗所重後神宗朝爲樞密直學士知秦州居數日夢英宗召語眷如平生驟得疾卒

○故漢將軍

宋

范祖禹字夢得初生母夢一偉丈夫披金甲至寢室曰吾

政漢將軍鄧禹也。遂以爲名。後拜翰林學士。

○宰相碑 宋

杜鴻漸之父名福舉父子而似兄弟之名。蓋有繇也。鵬舉嘗夢有所之。見一大碑云。是宰相碑。已作者。金填其字。未者刊名于柱上。因問有杜家兒否。曰有。任自看之。記得柱下有烏扁旁曳脚。而忘其字。乃名子爲鴻漸。後果爲相。

○中丞推勘 宋

辛次膺爲湖襄提刑。至武昌。岳少保飛通謁執辛手曰。前日夢中丞推勘驚寤。不敢告人。而津吏適報公至。公他日必爲獨座。願公救護之後。秦檜誣飛繫大理獄。命新除中

丞何鑄勸其事。方悟所夢。非幸。乃新除中丞也。

○通刺相公

宋

梅侍讀知濠州。嘗夢有人通刺云。相公來謁。睡起。通判呂殿丞至。乃文靖公也。梅見其言論奇特。遂厚待之。梅後坎垓。當呂作相。引爲待制。後至金華之拜。

○相公來謁

宋

王文穆公作舉人時。謁南頓喬給事。喬晝寐。夢有人告云。相公來謁。喬戒闢者云。有賓客來。卽通報。項之有一舉人投刺。乃文穆也。喬引入卧內。見其容貌磊落。以家人之禮待之。洎公作相。喬之子孫皆拔擢。

○牛相公來

宋

劉景洪事楊行密爲江西牙將彭玕脇景洪附湖廣。僞許之後以歸行密。景洪曰。我不從彭玕。因活萬餘人。後必隆因名所居山曰復隆山。山有牛僧孺讀書堂。後曾孫沆之母夢牛相公來而生沆。

○爲宰相子

宋

王僕射初爲譙幕。因按逃田。時歲飢而流亡者數千家。乃力謀安集。上疏論列。乞貸以牛糧種子。朝廷從之。一夕次蒙城驛。夢空中有紫綬象笏者。以一綠衣童子遺之曰。上帝嘉汝有愛民之心。以此爲宰相子。後果生一男。王亦拜

棺。

○指麾方略 明

金華苗軍作亂。殺叅政胡大海。上痛念之。追封越國公。塑像配享晉卞壺廟。初大海未遭難。前一日。嘗夜出。人見其兩目炯炯。有光若紅燈。及旣薨。敵兵有犯境者。軍中輒夢大海坐胡牀。指麾方略。儼如生時。或夜見火光遍野。洶洶若數萬人馬聲。師出輒大捷。似有陰助。以大海爲神。

○劉秉忠語 明

姚廣孝。法名道衍。初從成祖於燕邸。居故慶壽寺。每夢與劉秉忠語。後以靖難功。至太子太師。

○○○ 佛仙類

○金人頂光明

東漢

明帝夢見金人長大頂有光明以問群臣或曰西方有神其名曰佛其形長丈六尺而黃金色帝于是遣使天竺問佛道法遂於中國圖畫形像焉。

○金像灌湯

齊

竟陵王崇信內典得熱病夜中垂死夢見金像手灌神湯因遂平復。

○觀音授方

齊

李景純傳有一婦人久患痢將死夢中觀音授方服之遂

愈用木香一味。細末。米飲調下。

○勝力菩薩

傳

陶弘景夢佛授其菩提記。名爲勝力菩薩。乃詣鄒縣阿育王塔自誓受五大戒。

○聖帝賜盒中物

隋

崔府君父讓世爲巨農。純良德義。鄉里推重。年將知命。未立嗣。讓與妻虔誠禱於北岳。是夜夫妻夢一仙童。手擎一盒。詣門曰。聖帝賜盒中之物。令吞之。言訖。舉盒蓋觀之。見美玉二枚。夫妻各吞其一。忽然而覺。大業三年六月六日。生一子。神采秀美。異於常人。幼而從學。日誦千言。不窺群

子之戲因名子玉。凡事過人。鄉人咸以爲天賜也。

○二十七仙人

唐

唐玄宗夢二十七仙人云。我二十八宿也。一人寓直在天門下。我等寄羅底間三年矣。玄宗問羅底所在。仙云。有音樂處是也。詔訪焉。於寧州東南五里。地名羅川。之上有山。山有洞穴。翳薈不可通。惟樵牧者時聞音樂。乃於此窮之。得石室中有石像二十七。遂應詔以進。

○佛手摩心

唐

羅璵妻費氏。父悅爲寧州刺史。費少而信誦法華經。數年不倦。後得病。忽若心痛。闔門惶懼。屬續待時。費心念我誦

經勤苦。宜有善祐。庶不遂致死也。既而睡。食頃。夢見佛於
牕中。援手以摩其心。病遂愈。

○念寶勝佛

唐

袁史。兵亂。肅宗訓兵靈武。屢夢金色人。念寶勝佛於御前。
翼日。以夢中事問左右。或對曰。有沙門行迹不群。居此山。
恒誦此佛號。召至。帝視之曰。真夢中人也。

○柏葉仙人

唐

田鸞。長安世家也。欲求長生術。入華山。遇一黃冠。指柏樹
示之曰。此卽長生藥也。但欲食之。無聞耳。鸞歸。取柏葉曝
乾。爲末。服之。漸覺煩熱。至八年。無間。熱如火。遍體潰爛。發

食之不輟。一日覺小可。須湯沐浴。遂得寢三日方寤。諸瘡掃去。膚肉光澤。自云初寢。夢黃冠數人持節引謁。上清見列仙皆云。柏葉仙人來。遂授以仙術。勤名玉牌金字。謂曰。且止人間。後當相召。復引而歸。鸞自此辟穀。至百二十三歲。得尸解云。

○來和天尊

宋

楊礪爲舉人時。夢至一大殿。有坐殿上者。語之曰。我非汝主。來和天尊。汝主也。指示令謁之。礪後進士第一。入爲襄府記室。旣謁。如夢中所見。後襄王卽帝位。

○回岩客

宋

崇仁田家黃氏子。夜夢偉丈夫。自稱圓岩客。令語世人曰。此浮雲洞也。

白石洞天主者

宋

宣帝間。謁職有常懷者。謂宗室趙子崧曰。吾夜夢帝勅公。爲白石洞天主者。後子崧被謫龍州。尋夜自便道梗。未能歸。寓居潯州。潯有白石山。卽道書所記二十一洞天也。子崧竟沒於潯。符常夢云。

○仙官贊拜

宋

蔡京以道人王老志見徽宗。老志熟視上曰。頗記老臣否。徽宗亦記嘗夢游帝所。有仙官贊拜者。其面目卽老志也。

恩禮遂渥

○南嶽真人 元

虞汲娶國子祭酒楊文仲女文仲守衡時以汲從汲未有子爲禱於南嶽汲妻既有娠將娩文仲晨起衣冠坐而假寐夢一道士至前牙兵啓曰南嶽真人來見既覺聞甥館得男心頗異之是生集集三歲卽知讀書汲挈家趨嶺外干戈中無書可携楊氏口授語孟左傳歐蘇文輒成誦比長盡通諸經以春秋名家自將仕郎十二轉爲通奉大夫贈江西行中書省參知政事封仁壽郡公元主嘗出獨見建奎章閣以延咨訪特以集爲學士且集孝友篤至有恤

孤之仁。有知人之鑒。不獨以文章爵位顯固宜其爲神人云

○捧香盒仙童

明

倪文僖公謙字克讓爲翰林學士時天久不雨朝廷遣祭北岳公精白一心以感格之雨應期降是夕夢岳神謂曰今日朝士致祭於予其誠敬如此予以捧香盒仙童與爲嗣焉時夫人姚氏在京亦夢紫衣人自天而降遂生文毅公其所生之日與文僖公所夢之夕適相符因名曰岳字舜咨體貌豐碩目光炯炯望之如神人少有高識人皆以爲公輔器也由進士累官至太子少保吏部尚書文學

行業大用於時詩曰維岳降神生甫及申豈不信哉

○劉海蟾明

嘉靖乙亥十二月二十三日何少宰孟春夢至一所三四道士相與飲啜已而有先去者何繼出門未行聞堂中人謂童子曰我劉海蟾也爾師以藥金貯食餉我殆知我者我歌其或喜之於是歌曰百年非是等閒身學道而今祇四人中有兩人須得道不知誰主更誰賓何乃駐而聽之心亦自疑不知其所謂得道指誰其人又歌數闕中一首曰此身生意與誰論紅綠年年共一根常向人門問門口却忘門口是家門語多疊字夢差不了了既覺不能盡憶

○○○神鬼類

○滄水使者

夏

子稱滄水使

禹夢綉衣男子稱滄水使者。于是得知水脉。

○泰山神

周

太公望爲灌壇令。文王夢見婦人當道哭。問其故。曰。吾秦山之神也。嫁爲西海婦。灌壇令其當道。不得作風雨。夢覺。召太公。是日果疾風暴雨。

○海神戰

秦

始皇遣方士徐市等入海求神藥。數歲不得。始皇夢與海神戰。如人狀。問占夢博士曰。水神不可見。以大魚蛟龍爲

候今上禱祠備謹而有此惡神當除去而善人可至乃令入海者齊捕巨魚具而自以連弩候大魚出射之自琅邪北至榮成山弗見至之杲見巨魚射殺之遂平海西至平原津而病

○與神遇

西漢

漢高祖父曰太公母曰劉媪其先劉媪常息大澤之陂夢與神遇是時雷電晦冥太公往視則見蛟龍於其上已而有身遂產高祖

○鬼物變怪

東漢

王延壽有雋才少遊魯國作靈光殿賦夢鬼物之變怪有

蛇頭而四角。魚首而鳥身。三足而六眼。龍形而似人。群形而輩搖。伸臂而舞手。意欲相引牽也。夢中驚怒。乃作夢賦。以自廣。後度湘江溺死。時年二十四。

○臨濟水神

東漢

劉伯玉妻段氏。性妬悍。自溺死。後七日。夢與伯玉曰。吾得爲臨濟水神。有美人渡津者。必壞衣裳。不爾。風波暴起。伯玉終身不敢渡臨濟津。

○兩鬼七首去

晉漢

翼德晝臥。夢一虎踞石牀。爲兩鬼七。其首而去。寤而異之。旬日後。爲范張所刺。

○河神請

東晉

明帝時獻馬者夢河神請之。及至與帝夢同。卽投河以奉神。

○與鬼爭義

齊

崔浩奉詔學天文星曆。易式九宮。專心鬼書。忘寢與食。乃至夢與鬼爭義。遂得周孔之要術。

○使君遣牧馬

梁

天監初。蚌湖村人獵蘇嶺。見二鹿極大。乃走馬逐之。至嶺神廟前。遂失所在。唯見石鹿。疑是向鹿所化。遂回夜夢一人著單巾。幘黃布袴褶。語云。使君遣我牧馬。汝何驅迫。賴

得無他。若見損傷。豈得全濟。

○鬼神同享醢

隋

華僑頗通鬼神。嘗夢同共享醢。醒則醉吐狼籍。

○孝通神明

隋

劉師貞。字文通。彭城人。早失母。長不記容狀。至忌辰。終日涕泣。未嘗寢食。忽夢見其狀。謂之曰。我爾母也。爾孝通神明。故我得見夢於爾。師貞夢中大哭。及覺。哀號愈甚。乃作偶人像。以事之。朝夕起居。反告如常。每新物必先薦。然後食。時人語曰。孝通幽明。漢有丁蘭。唐有師貞。父福年老。患目。凡飲食。非師貞親調。則不能食。師貞偶臥疾。其父食不

安師貞曰。飲食不精之所致耶。驚起而愈。兄有疾。經旬不瘥。師貞。永不解帶。夢神人曰。若兄苦風。取胡王使者酒。漬服。愈。師貞求之。藥肆皆不曉。因夢其母曰。胡王使者。羌活也。覺而求之。兄疾遂愈。其後父沒。居喪有雙白雀。飛宿戶間。除几筵之日。對師貞悲鳴。頓翅久之乃去。

○龍王女 北魏

崔子武幼時夢一女子。姿色甚麗。自云龍王女。願與崔郎私。好子武悅之。牽其衣裾。微有裂綻。未曉告辭。結帶而別。至明往山祠中觀之。傍有畫女。容狀卽夢中見者。裂裾結帶猶在。子武自是通夢。恍惚成疾。後逢醫禁之。乃絕。

○老公拜立道左

北魏

北魏主幸洪池。夢一老公拜立道左。云晉侍中稽紹。故此奉迎。神爽早懼。似有求焉。以問任城。任城曰。當是希恩而感夢。於是求其域兆。遣使弔祭焉。

○被訴閻摩天子

唐

江陵力昌殺一大蛇。一夕力昌死。夢告其妻曰。吾在生殺一蛇。被訴于閻摩天子。追我于冥司。令蛇纏身噬嚙。痛苦難忍。須爲我請僧誦寫金剛經七卷。懺悔救厄。妻覺驚子。與蜀客得錢寫經。已而憶子日盲。誦經求乞。後蜀客子得其貲歸。念母設齋。丐者盈門。中有一嫗盲目。口誦金剛經。

自言驚子薦夫事細問之乃其母也遂悲喜復合母目亦尋愈焉。

○神人覆鼎

唐

景雲元年楊氏選入宮時太平公主用事太子心不自安楊時有娠太子密令張說懷去胎藥而入太子躬自煮藥醺然似寐夢神人覆鼎既寤復夢如是者三太子異之告說說曰天命也既而太平誅太子卽位是爲玄宗立楊氏爲后果生子是爲肅宗。

○九天使者

唐

開元中帝夢神仙羽衛千乘萬騎集于庭中有一朱衣神

來謁云。我九天使者。欲於廬山西北。置一下宮。自有木料基址。但須工力耳。帝寤。遣使詣山。果有基址。信宿。有巨木千數。自至。殿堂廊宇。皆得其用。

○凌波池龍女

唐

玄宗在東都。晝寢。夢一女子。容色穠艷。梳交心髻。大帔廣裳。拜于牀下。上曰。汝是何人。曰。妾是陛下凌波池中龍女。衛宮護駕。妾實有功。今陛下洞曉鈞天之音。乞賜一曲。以光族類。上于夢中。爲鼓胡琴。拾新舊之聲。爲凌波曲。龍女再拜而去。

○終南進上鍾旭

唐

帝因疔疾作。晝夢一小鬼。衣絳犢鼻。跣一足。腰懸一履。持一筠扇。盜太真繡香囊。及上玉笛。繞殿奔戲。上前上叱問之。小鬼奏曰。臣乃虛耗也。上曰。未聞虛耗之名。小鬼奏曰。虛者。望空虛中。盜人物如戲。耗人家喜事。成憂。上怒。欲呼武士。俄見一大鬼。頂破帽。衣藍袍。繫角帶。靴朝靴。逕捉小鬼。先剗其目。然後擘而啖之。上問大者。爾何人也。奏云。臣終南進士鍾馗也。因武德中。應舉不捷。羞歸故里。觸殿階而死。是時奉旨。賜綠袍以葬之。感恩發誓。除天下虛耗妖孽之事。言訖而寤。疔疾頓瘳。乃詔畫工吳道子曰。試與朕如夢圖之道。子奉旨。恍若有覩。立筆成圖。進呈。上視久之。

撫几曰是卿與朕同夢耶。賜以百金。

○竹山神

唐

玄宗嘗夢一人紫服自稱竹山神。來獻瑞鳳。翌日果有鳳翔。遂名其山爲紫籙山。

○神介而劍

唐

肅宗吳后夢神介而劍。決脇以入。燭至其文隱然。生代宗。

○黃魔神

唐

咸通中蕭遼自太史窺黔南泝三峽秭歸夢神人曰我黃魔神也。居紫極宮西北隅。將祐助公出此境。

○天王責

唐

彭城劉山甫中朝士族也其父官於嶺外侍從北歸舟泊於青草湖登岼見有北方天王祠因詣之見廟宇摧頽香火不續因題詩曰壞墻風雨幾經春草色盈庭一座塵自是神明無感應盛衰何得却繇人是夜夢爲天王所責自云我非天王南嶽神也主張此地何爲見侮俄而驚覺風浪暴起殆欲沉溺遽起悔過然後方定

○鬼押五人

宋

吳中有朱進士者聽佛印禪師講金剛經而悅之次日夢一鬼押五人朱亦同行約二里許入一門挂青布簾鬼揭簾俱入至厨見灶上桶內有湯五人皆飲之朱亦欲飲鬼

喝曰聽經人不得飲遂驚覺明旦覓得其家叩門入問主人厨下有何動靜主人言厨下方產六犬死其一朱乃驚悟

○不必吾言

宋

黃公度字師憲自莆田赴省試初與里中陳俊卿約同行以事未辦集公度後數日乃登途過建安詣黎山李侯廟謁夢夢神告曰不必吾有言只見陳俊卿他所說者是也黃至臨安方與陶會卽謁其得失陳蓋未嘗至彼廟也辭以不能知黃逼之不已陳怒大聲咄曰師憲做第一人俊卿居其次足矣黃喜其與夢合乃以告之旣揭榜如其言

○救爾一家 宋

滑世昌爲鄂州都統司醫官。居於南市。家貲鉅萬。而行醫以救人爲心。鄂之人盛稱其德。淳熙十四年十一月望日之夜。夢有客來訪。車騎甚都。云是城隍神主。言此邦明日有非常大災。民懼非命。君家亦應墮此厄中。以君平日用心慈仁。陰功昭著。我當救爾一家。但貲財不可得耳。世昌再拜。且伸懇禱云。若使幸免。而貲財蕩然。與死一也。神曰。此却易辦。決不至凍餒。恍然而覺。聞樓鼓已五更。呼告其妻。妻亦夢如是。深以爲憂。至旦。天大風。陡寒。世昌方朝食。漢陽武八官招之視疾。及還家。已昏暮。夜未半。火作於市。

世昌居烈燄中。念閨門十口。無計自脫。忽有壯夫數十輩。著紫衫。排列火邊。驅家人登轎。徑昇至將臺下。相去六七里。俄風雪大作。適路有空屋。趨避於中。相看如癡。黎明人轎俱不見。顧舊居已瓦礫之場矣。掇剔埃煤中。得銀三十餘兩。始悟不至凍餒之說。旋僦宅於城中。醫道復振。家業愈昌。子孫三世皆致大富。

○神延上座

宋

李綱嘗謁歐陽祐廟。夢神延令上座。綱辭神曰。他日更仗主盟。及神加封時。綱已拜相。果與署名。

○神杵指腹

宋

明州王氏隨夫之任懷胎過期不產羸病漸深一夕夢金剛神以杵指腹疼不可忍及覺已生二男在床

○瑤臺女

宋

許澶暴卒三日醒作詩云曉入瑤臺露氣清坐中唯見許飛瓊塵心未盡宿緣在十里下山空月明復寐改第二句云天風吹下步虛聲曰昨夜夢到瑤臺有女三百餘人一云是許飛瓊令改二句不欲世間知有我也

○鬼所枉殺

宋

廣平太守馮孝將男馬子夢一女人年十八九歲言我乃前太守徐玄方之女不幸早亡亡來四年爲鬼所枉殺按

生錄乃壽至八十餘。今聽我更生。還爲君妻。能見聘否。馬子掘開棺視之。其女已活。遂爲夫婦。

○西域神人

元

吳萊字立夫諱直方。集賢大學士致仕。初母夫人盛氏懷娠七月。公忽夢西域神人飛空而來。止夫人之寢。心異之。越翼日萊生。因以爲名。夫人頗知書。年四歲授以孝經論語。春秋穀梁傳。隨口成誦。七歲善屬文。及長博極群書。至於制度沿革。陰陽律曆。兵謀術數。山經地志。字學族譜之屬。無所不通。遂成大儒。學者稱爲淵頴先生。卒應西域神人之夢。

○神授藥劑

元

陸思孝母病痢醫禱不効。思孝方欲割股肉爲糜以進。忽夢神人授以藥劑。瘥而得之以療其母。痢果愈。

○神授一兒

明

張司寇瑄字廷璽。應天江浦人。公將生。母夢神授一兒。旣而誕。公容質俊麗。目光炯然。爲庠生未幾。其同門郭瑤謂曰。吾昨夜夢君戴紗帽。但頂上窄而平。下垂兩帶。嘗聞進士巾製如此。君其中進士乎。明年辛酉。公之堂兄琮夢迎舉人。見一人乘白馬來。視之乃公也。其年秋。果中高選。刊行禮經文字。比春祭丁。縣致膳。翼日公父往謝邑宰。宰降

階迎笑曰。令嗣已中進士矣。公父曰。今日始會試頭場。宰
曰。不然。我昨夢縣後坐山上。響震一聲。聞人曰。送人才。見
一人乘車。狀貌類梓潼帝君。群用鼓樂送出街上。至君門。
車中忽不見。仰視君家。臨街屋宇五間。皆有獸頭。非令嗣
中進士而何。踰月。泥金果至。後公以刑部主事。憂回。其親
家仰仲賢。夢人以錦囊盛一印遺公。文曰。南宗之印。見門
外豎一方牌。扁曰。羅剎之門。及任廣東布政。成化乙酉。都
御史韓公雍奉命來征兩廣徭賊。駐廣西。有僉事張祚
先迎韓。同在廣西。韓又取公與副史陳廉赴軍前議事。值
江水泛漲。月餘不能到。至九月九日。始達桂林。張僉事迎。

謂曰。昨夕夢接張都御史。今日二公到。異哉。壬辰公任都御史。巡撫福建。甲子轉河南。過南京。見司寇周公。謂曰。與公別數十年。未嘗形諸夢寐。昨夜忽夢與公同榻。此其公代兆也。在福建。未轉河南時。其弟玠夢人語曰。你兄今轉河北巡撫矣。既而果然。蓋黃河舊在汴城之北。故也。初公任吉安府時。夫人劉氏嘗夢張通判衙鶴一雙飛集本衙庭內。無何陞布政。後歷四考。以地方多故。不得給由。一日劉又夢龍鬬於空。直天井內。既覺。猶聞角鬬格格有聲。忽詔到。內開有司官。地方有事。不得給由者。俱給與本等語。勅公平生以文章政事夙負時名。而其出處履歷皆

有定分。如此則天之生才。豈偶然哉。或者汲汲富貴。至欲以巧力得之。可謂不知命也。但仲賢所夢羅剎之門。稍欠明白。竊意羅者罪罟也。剎者裁截也。公爲大司寇。職司法網。剖析刑獄。其羅剎之謂乎。劉所夢張通判衙內雙鶴飛集本衙。蓋張乃公姓。通判卽布政通理一省事也。

○○○釋道類

○枉殺貧道

宋

宋高祖以劉毅爲撫軍荊州刺史。到州便收牧牛寺主云。藏桓家兒慶爲沙彌。并殺四道人。後夢見此僧來云。君何以枉殺貧道。貧道已得白于天帝。恐君亦不得久。明日毅

遂得疾。日羸瘦。後投牧牛寺。寺僧曰。撫軍枉殺吾師。吾師屢有靈驗。云天帝當收撫軍殺。嘆叱出寺。自縊大樹死。

○眇目僧

梁

武帝夢眇目僧。執香爐稱托生王宮。既而有采女阮氏侍帝幸之。遂生繹。初生患眼。帝自療之。遂盲一目。乃憶先夢。封湘東王。是爲元帝。

○當爲汝師

唐

司空圖嘗夜夢二僧。謂之曰。吾當爲汝師。汝昔矯於道。銳而不固。爲利欲所拘。幸而悔悟。將復從我。于是且汝雖退。亦嘗爲匪人所嫉。宜耐辱自警。庶保其終始。與靖節醉吟。

第其品級復何求哉。圖因號耐辱居士。

○僧入寢門

唐

龐嚴爲衢州刺史到郡數月。忽夢二僧入寢門。嚴不信。釋氏夢中呵之。僧曰。使君莫怒。予有先知。故來相報耳。嚴喜。問之曰。予爲相乎。曰。無。曰。節制乎。曰。無。曰。然則當爲何官。曰。類廉察而無兵權。有土地而不出畿內。過此以往。非吾所知也。曰。然則壽幾何。曰。惜哉。所乏者壽耳。向使有壽。則無求不可。曰。當何日去。曰。來年五月二十三日。及明年春。有除替。先以狀請於臺。使元積。元素與嚴善。必謂得請。以其晦日宴客。得元公復書云。請候交割。嚴發書曰。予固知。

未可以去具言其夢中事於座中。竟以五月二十三日發行。後爲京兆尹卒。

○白鶴觀道士

唐

唐末祁陽縣白鶴觀有鐘重數百斤。一夕雷雨。鐘忽吼躍入江中。後有客夜宿昭潭。夢一道流曰。吾祁陽白鶴觀道士。欲歸久矣。幸附後載。客諾之。遲明解纜。見有鐘卧水次。有文祁陽白鶴觀鐘。客悟乃載而置之觀。

○五戒殺貧道

唐

西明寺僧曇暢將一奴二騾向岐州稜法師處聽講。道逢一人着衲帽敝衣。捏數珠自云五戒。夜至馬嵬店同宿。五

戒禮佛誦經。半夜不歇。暢以爲精進。及四更。卽同發去。店十餘里。五戒忽袖中出兩刃。刺殺暢。其奴下馬入草走。五戒騎騾驅馱前去。主人卽夢暢告云。昨夜五戒殺貧道。須臾奴走到告之。如夢時同宿。三衛子珮持弓箭乘馬。趕四十餘里。以弓箭擬之。卽下騾乞死。縛送縣決殺之。

○鐵冠道人

宋

邵武人徐熙春。夢鐵冠道人。儀容修偉。旣寤。至城南五峰院。遇所夢者。自云姓蔡。住武夷。遺以五花草。食之甘美。自此不復粒食。但飲清泉。約以某日至武夷。至期而往。蔡已先在。徐以水深不能渡。止于金身院。修煉尸解而去。

○可問覺海

宋

程夷伯峽州富人也年二十九一夕夢其父曰汝今年當死可問覺海夷伯茫然不曉一日有蜀僧寤銓字覺海善相術夷伯問曰我壽幾何覺海曰君年甚促但覓求一杯呵氣入水中令夷伯飲之曰今夜有吉夢可相報卽夜夢至一官府左廊下男子婦人衣冠嚴整皆相欣悅右廊下盡枷鎖縲紲之人哀號涕泗傷有人云左廊是修橋路人右廊是毀橋路人若爾要福壽自可擇取夷伯遂悟卽發心凡橋梁路道一一脩整用功畢覺海復來云汝作此事壽可延矣後年至九十二而卒五世昌盛

藝倫類

○生子名虞

周

周武王與叔虞母會時夢天謂武王曰余命女生子名虞余與之唐及生子文在其手曰虞故遂應夢泉曰虞武王崩成王立唐有亂周公誅滅唐成王與叔虞戲削桐葉爲珪以與叔虞曰以此封若史佚因請擇日立叔虞成王曰吾戲之耳史佚曰天子無戲言言則史書之禮成之樂歌之於是遂封叔虞於唐

○其父同出

東漢

孝女叔先雄者健爲人也父泥和永建初爲縣功曹縣長

遣泥和持檄謁巴郡太守乘船墮湍水物故尸喪不歸雄感念愁痛號泣晝夜心不圖存常有自沉之計所生男女二人並數歲雄乃各作囊盛珠環以繫兒數爲訣別之辭家人每防閑之經百許日後稍懈雄因乘小船於父墮處慟哭遂自投水死其夕弟賢夢雄告之曰後六日當其父同出至期視之果與父相持浮於江上郡縣表言爲雄立碑圖象其形焉

○買汝長子

東晉

王導夜夢一人曰以五百貫錢買汝長子許之後掘錢一窖長子暴死

妻寢有身

東晉

咸和初徐精遠行夢與妻寢有身。明年歸妻果產。

○新婦被處分

齊

涼州刺史宋頴前妻劉氏。亡後十五年。頴夢見之。拜曰。新婦今被處分。爲高崇妻。故來辭君。泣然流涕。頴旦見崇言之後數日崇卒。

○人害已

齊

康王友孜使刺客刺末帝。帝方寐夢人害已。既寤起拍劍曰。將有變耶。乃索得刺客手殺之。遂誅友孜。

○生貴子

梁

欽后之母。宋文帝女尋陽公主也。方娠夢當生貴子。乃生后。

人出身中

梁

李廣以才學兼御史修國史。嘗欲早朝。未明假寐。夢見一人出身中。語云。君用心過苦。非精神所堪。今辭君去。覺而語妻。因恍惚不安。數日便遇疾。竟以此終。

願生貴子

陳

張仲淳秀州人。忽有一商旅途中感疾。投宿於其家。仲淳詢其來。但略言其名氏鄉里。遂不能語。而斃。仲淳閱其行裝。有金十兩。乃遣人召其妻子。護屍持金而歸。復捐貲經

營塋之是夕夢其人謝云公平生不欺心隱財陰德甚厚
願明年生貴子至期果驗

妾得計矣

隋

秦王俊有疾隋主馳召許智藏療之俊夢其亡妃崔氏泣
曰本來相迎聞許智藏將至必當相苦爲之奈何次夜俊
又夢崔曰妾得計矣當入靈府中避之智藏至爲俊診脉
曰疾已入心當發癰不可救也數日果以癰死

惡人生心

北齊

慕容德迎兄子超于長安既至夢其父曰汝既無子何不
早立超不爾惡人生心覺語妻曰先帝神明所勅觀此夢

意吾將死矣乃以超爲太子是月德死。

男子求爲妻

唐

李節婦嫁鄭廉未逾年而廉死夢一男子求爲妻初不許後數數夢之李自疑容色所召卽自截髮毀容其鬼謝曰夫人竹栢之操不可奪也自是不復夢。

汝子必貴

唐

楊旬任夔州推司處以正直積累陰功旬有子年二十三習科舉業一目稟父欲入試旬曰汝學未充不可旬當夜夢神告曰汝陰騭有感吾特來報汝汝子將來必貴若應舉須改楊椿納卷旬旣得夢次日令子作楊椿名納卷果

得第六名。次年赴省試。樁自夢一神謂曰：「今年省題乃是行王道而王。」試之日，果如其夢。試中九十六名。廷試唱名，遂魁天下。卒符前夢。

托爲嗣

唐

豫章李脩已爲成都通判。太守欲籍張主簿家產，而非其罪。李到任，首以爲言，得免簿具啓致禮來謝。李歸德於守，不受李時年四十九，尚無子。簿繪李像置天神前，夫婦日夕拜祝願早生好兒。旣而李陞守，妻蔣氏有娠。簿方歿，夢托爲嗣而生子。後登第，仕至中散大夫。

特賜男女

宋

馬默知登州。先是沙門島罪人舊制有定額。官給糧者才三百人。每溢額則取其人投之海中。默建言朝廷既貸其生矣。卽投之海中。非本意也。今後溢額乞選年深。自至配所。不作過人。移登州。神宗然之。卽詔可。著爲定制。自是多全活者。未幾默坐堂上。忽夢一人乘空來。如世間所畫符使。左右挾一男一女至前。大呼曰。我自東岳來。聖帝有命。奉天符。馬默本無嗣。以移沙門島罪人事。特賜男女各一。遂致二童乘雲而去。後生男女各一。默官至河北都轉運使。年八十卒。贈太保。

復爲君婦

宋

王貞婦梁氏嫁夫纔數月會元兵至與夫約曰吾義不受辱若復娶須告我頃之夫婦被掠有千戶習侯從日給之曰夫在有所不忍乞歸之而後可千戶以金帛與夫并與一矢以却後兵約行遠千戶卽犯婦婦拒且罵曰吾與夫誓天地鬼神實臨之乃被殺後數年夫謀更娶議輒不諧因告其故妻夜夢妻曰我死後生某家今十歲矣後七年當復爲君婦明日聘之一言而合詢其生與婦死年月日同云

○紫衣人謁見

明

薛文清公瑄字德溫山西河津人母齊氏夢一紫衣人謁

見已而生公年十二作詩賦監司奇之已而從范魏二先生講周程張朱諸書嘆曰此道學正脉也遂焚其所作詩賦專心於是至忘寢食由進士累官至禮部左侍郎公初擢御史提學山東人皆呼之曰薛夫子國朝仕途中能以理學爲務者惟公一人而已

夢林玄解卷之三十一

終